

Przeprawy Khynigica i Rom

Dawa sys już rat syr skhyniakirdo Rom zarykirdzia pe paś ruk kaj kuty te odkhynioł. Ćhudzia pe paś ruk i zasucia, ne siuneł kaj konś rakireł i nadzineł kon dowa. Dodział paś mecho przysiuneł pe a dawa mecho rakireł te jow i pucieł pe łesty kon jow sy.

- Me som Rom.

So dzia ophenawa tuke paramisia Romestyr i Khynigicatyr. Ophenawa tuke syr Roma tradenys wesienca syr hacikirenys jaga, paś łendyr khelenys a basiawełys łenge Gajgaro. Basiawełys najekwar dzia kaj dzi rowełys a najewkar kaj kokore hera kamenys te kheleł.

Hara, hara daleske dre weś zarykirde pe Roma sare soś kerenys. To paś grendyr, to rozmarenys budy a Gajgar lija peskry gajga i geja hor dre weś. Działys hara aż nasiunełys rakiryben romengro. Wgeja dur dre baro weś ne na sys dawa weś dasało kaj już łes gił dykcja. Saro peso dykhełys zdełys pe łaske ławyr, rukha przyrpyrenys khera, cirykle bagenys syr manusia.

Beścia Gajgaro paś ruk i dumineł so pes daj kereł? I do sarestyr zasucia.

Rat już pe kerełys syr przedzingadzija i kamełys te rysioł te Roma ne odrysioł i dykheł kuty duredyr te weś bary kher ne celo obariakirdo mechosa. Nadykheł nikones kaj doj te jaweł.

- So dawa sy - podumindzia Gajgaro i geja dre doja ryg.

Wdział te jek kher nani nikon, wdział te ławyr do korkoro. Tylko mecho barioł pe phuw i wanty. Dycioł sy kaj nikon daj hara na sys. Te tryto kher wdział i dykheł tysia zaćhudy habnasa dzia syrby pe łesty te ziakireł. Zabesicia Gajgaro i hał bo sys już bokhało a daj pe jekwar dykheł syr wdzian myszy i szczury a jangił dział khaca rydy te rupuno postyn.

Sare terdzine gił Romestyr i dykhen. Wyćhudzia peskre jakha Gajgaro bo syr dzido sy dasałe bucia na dykcja. A daj khaca rakireł te jow romanes:

- Siukar sy tyre gila. Sy syr bagipen ciryklenkry i rukhengro. Czy san dasało kurieś murś syr siukar basiawes?

- Kurieś? - pućcia pe Gajgaro. A konestyr man som te dareł da szczurendyr?

- Dykhes pe da štundengro, syr wymarła desiudujto štonda jaweła Beng i kameła tut daryk te wytradeł. So na dares łe gajga i basiaw dzia hara aż sinusa bagipen baśneskro. Beng hylcioła a tu dodzinesa tut tryn tajemnicy da fiłacinakry.

- Na daraw man Bengestyr i kerawa syr phendzian. Daw myro ław.

Pe jekwar zreścija baro bałwał i ke kher jawia Beng.

- So daj rodes? - pućcia pes Romestyr i kamdzia łes te deł ne Rom sygo htyłdzia gajga i dyja te basiaweł. Bang syr siundzia romani gili lija te hylcioł a syr zabagdza baśno nasiadzija.

Pałe beścia Gajgaro paś tysia. Hałys i piełys a syr podhaja ćhudzia pe pe mecho i zasucia. Sys już bary rat syr przedzingadzija, zdykcia pe wudara a doj pałe jawia khaca i łakre myszy i szczury. Kana sareng dyćle sy manusikane hera.

- So dawa pe kereł - pucieł pe Rom.

A khace pe dowo:

- Na puć tut ćsiestyr, nani ciro. Na hara Beng jaweła a tu rypyr kaj te basiawes syr tasia-pomangdzia khaca.

Przegeja hara na hara a daj pałe zreścija baro bałwał i przyjawia Bang. Gajgaro pałe lija te basiaweł ne sys łeske but pharedyr. Syr siundłe baśnes Beng hylcija.

Gajgaro sys dzia skhyniakirdo kaj sygo geja te pasioł pe mecho. Syr pałe htyja sys już rat. Rozdykheł pe i napacieł mecho but nasiadzija wantendyr i phuwiatyr. Wudarenca wgeja khaca myszenca i szczurenca ne kana te phaś sare sys syrusia.

- Na puć tut ćsiestyr, nani ciro. Na hara Beng jaweła a tu rypyr kaj te basiawes syr tasia- pałe pomangdzia khaca.

Pe ciacio syr wymardzia desiujek śtonda, Beng jawia dre kher. Rom pe ćsi na ziakirełys lija te basiaweł pe gajga ne kana jeszcze pharedyr łeske dzialys. Wydełys pe łeske kaj zoria sare łestyr operen. Pe ceło baht baśno dyja godli i Beng nasiadzija. Gajgaro peja bez zoriatyr pe phuw i zasucia.

Syr dzingadzija paśtło sys te baro ćsiyben dre siukar fiłacin. Zadykcia pełdy dudali a doj kaj sys rukha tordo kana sy barwało foro. Pełdy wudara wdział siukar Khynigica.

- Dawa myro foro i manusia a tu zlijan mendyr hyrja kosiben. Parykiras tuke pał saro.

- Ne syr dawa pe kerdzia -puciał pe Gajgaro.

Beś paś mandyr a saro tuke ophenawa. Na kamawys Benges pał romestyr a syr łeske odphendziom zaparudzija jamaro foro dre weś, myre manusien dre myszendyr i szczurendyr a man dre khacatyr. Hara bersia samys ziakirde pe dasałe manusiestyr kaj na tylko siukar basiaweł a i dzi sy łes łaćsio. Ćsi jamenca syr hara kames. Rom pojawia te one kuty ne pošli sowoś ciro rysija te peskre manusia. Khynigica dyja łeske but sownakaja a sare manusia przeparude forostyr parykirenys Gajgaroske.

Dołe cirostyr Gajgaro na basiawełys gila te kheliben tylko dasałe kaj pał dzi htylen. Łeskre gila siundło sys pe gawa, fory, wesia ne manusia duminenys kaj dowo bałwał dzia basiaweł.